

# No Servus, Diener und Habe die Ehre!

Etze kummt dos

## Nej su wos

vu Sömde, n 27. Jänner 2023



*Inge Fehrmann*

---

## Ane eignortsche Sporkasse

S wor salt an orschtn Walkriege, de Mannr worn olle eigerockt. Drheime wor ei jedn Hause große Nut. A poor ale Mannr, die nemieh werpflichtsch worn, konnte mr noch moichmoul an Dorfe sahn. De Weibr obr worn mit n Kindrn allejne drhejme und totn sich kimmrn. Dos ganze Labn drehte sich ock noch öms Assn, weils kaum noch wos gob und su tots ernewie ömmr wattr giehn.

Dr ollrwichtigste Mon an Dorfe wor obr dr Postboute. Welche Nouchröchtn word ha ocke wiedr brengn? Huptich, dr Postboute, wor a großr, stattlichr Mon mit an gedrehtn Schnurrborte. Herdeck, sog dar stattlich und strenge aus: bale wie dr Kaisr - mit sannr bloun Uniform mit dan goldnen Kneppn, Housn mit ennr massrschorfn Bieglfahle, om Koppe de Schörmmitze mit n goldnen Posthorn-Obzejchn. Ei dr großn schworzn Tosche tot ha dr de langdrsehnte Post brengn.

Wenn dar zu dan Froun kom, dou worn se immer ejn ufgeregt. S wor jo ou kej Wundr. Tot ha gude odr schlechte Nouchröchtn vu dr Front brengn? Huptich wor a Mon, dar ernewie ömmr gewosst hout, wos ei jedn Briefe drönne stond und tot de Froun beruhichn, bevr ha enn Brief hargob. Wenn obr ane schljachte Nouchröcht kom, dou tot ha sich ou ejn schwar. Dou wor ha ne zu beneidn. Dou brauchte mr sich ne wundrn, doß ha ejmoul ei dr Woche ganz garne zun Kortnspieln gegangn ös, öm de döchtschn Nouchröchtn zu drtrohn.

S gob noch su a Stamml, die sich immr bei Predigern an Gosthouse traffn totn. Dou drzune gehierte ou dr Tutngrabr Holubarsch ausn Niedrdorfe. A kom ömmr mitn Kindrwahl, und drönne soß dr Josi, sei Enklsuhn.

Ban Kortnspieln hout mr ou ne ömmr Glöcke, und Holubarsch hotte ane Pechsträhne. Die Kreuzr langtn ne die Spielschuld n zu zohl. „Ich ho noch Gald drhejme und nächste Woche war ich olls bezohl!“ mejnte ha. Wie ömmer kom Holubarsch s nächste Moul mit Josi an Kindrwahl zun Kortnspieln. De Kampl totn schun wortn. Glei wie ha eis Gosthaus neikom, mejnte ha: „Heute zohl ich mane Spielschuld n! Ich ho mane Sporkasse drbeine. Die ös ganz sicher, dou gieht ne amoul mane Froue dro.“

Ausn Kindrwahl ndern Struhsacke tot Holubarsch a rutes Eibindehickl avierziehn, tots ofn Tiesch stelln, knetertes imständig uf und mejnte: „Dos ös mej Tukotscheißr.“ Zun Vorscheine kom de Sporkasse – a Tutnkoup. Nejjessesnej!!! Drschrockn totn olle Obstand nahm. Huptich wor ufgesprungn und mejnte: „Mensch Holubarsch, wos fällt dr denn ei?“ Emil wur tutnbleich und mejnte gor: „Dos Gald mog iech ne! Mr ös elende!“ Vrwundert obr sohte Holubarsch: „Doudrvur misst dr euch ne ekl n, ne römprissln, mich oflunschn und su örre uffiehrn. Ich ho dan Koup mit Grußmuttrsch salbrgemachtr Schmeersejfe saubr gewoschn. Außerdan hout jedr vu euch su a Ding om Holse sötzn.“

S Bier tot nemieh schmeckn. Prediger musste fr olle enn Schnops hulln und Holubarsch tot sich zugutte gahn und ieblerhte: „Nächstes Moul nahm ichs Gald glei ausn Tutnkoppe, bevr ich zun Kortnspieln giehl!“ Dos wor a gudr Denkrich! Meintr ne ou?

---